

聞喜縣志卷之六

人物中

元魏

裴駿字神駒小名皮父雙碩恒農太守安邑子贈東雍州刺史聞喜侯駿幼而聰慧親表稱爲神駒因以爲字弱冠通涉經史方檢有禮度鄉里宗敬焉汾陰薛永宗應蓋吳來襲聞喜駿率厲鄉豪奔赴賊退會太武親討蓋吳引見駿駿陳叙事宜帝大悅謂崔浩曰裴駿有當世才其忠義可嘉補中書博士浩亦深器駿目爲三河領袖轉中書侍郎宋使明僧暲來聘以駿有才學假給事

聞喜縣志

卷之六

人物

一

中散騎常侍於境上勞接卒贈秦州刺史聞喜侯諡曰康祀鄉賢通志載人物

裴修字元奇駿子清辯好學歷位秘書中散主客令累遷中大夫兼祠部曹事斟酌故實咸有條貫卒諡曰恭伯追贈東秦州刺史修早孤居喪以孝聞二弟三妹並在幼弱撫養訓誨甚有義方季弟務早喪修哀感行路愛育孤姪同於己子及將異居奴婢田宅悉推與之時人稱焉通志載人物

裴宣字叔令駿次子少孤事母兄以孝友稱通辯博物司空李冲見而重之孝文初徵爲尚書主客郎累遷太尉

長史請令州郡戍邏埋掩骸骼并符出兵之鄉使招魂
祔祭復其年租調傷痍者免其兵役從之出爲益州刺
史至州綏撫甚得戎羌之心宣雅尙廉退嘗謂親賓曰
以賈誼之才漢文之世不歷公卿將非運耶吾本無當
世志直隨牒至此祿厚養親效不光國可以言歸矣因
奉表求解不許乃作懷田賦以叙心焉宣素明陰陽書
尅亡日如其言贈豫州刺史諡曰定尋改爲穆通志載
人物

裴聿字外興崧子以操尙貞立被孝文所知由著作郎出
爲北中府長史帝以聿清貧欲以幹祿優之命帶温縣

聞喜縣志

卷之六

人物

一一

時人榮之轉尙書郎遷太尉諮議叅軍卒於平秦郡太
守贈洛州刺史子子袖入關西通志載人物

裴仲規崧從子咸陽王禧爲司州牧辟主簿仍表行建興
郡事車駕自代還洛次於郡境仲規備供帳朝於路側
高祖詔仲規曰朕開置神畿郡望崇重卿旣首應司隸
美舉復督我名邦何能自致也仲規對曰陛下窮神盡
聖應天順民棄彼元壤來宅紫縣臣方罄心力躍馬吳
會冀功銘帝籍勲書王府豈一郡而已高祖笑曰冀卿
必副此言車駕達河梁見咸陽王謂曰昨得汝主簿爲
南道主人六軍豐贍元弟之寄殊副所望除司空主簿

父在鄉疾病棄官奔赴以違制免久之中山王英征義陽引爲統軍戰歿贈河東太守諡曰貞無子弟叔義以次子伯茂後之通志載人物

吳悉達兄弟三人俱幼父母爲人所殺四時號慕感動鄉隣及長爲報仇避地永安兄弟同居四十餘年讓逸競勞閨門和睦隣人孤窘者輒解衣輟糧濟之鄉閭五百餘人詣州請刺史表贈其父渤海太守後圖改葬失父舊墓所晝夜哭禱於神出行所履地忽陷得父銘記因遷葬宗祖以下三世九喪哀毀如初有司奏聞表閭復役北史列孝義明永樂閒編入孝順事實與裴敬彝並

聞喜縣志

卷之六

人物

三

傳祀鄉賢通志載孝義

裴夙字買興儀陽太守三彪孫桃弓子沉雅有器量儀望甚偉北魏高祖見而異之任城王澄時爲吏部尚書有知人鑒每嘆美以遠大許之初隸司空主簿轉尚書左主客郎中高祖南伐爲行臺吏部郎仍除征北大將軍穆亮從事中郎遷河北太守以忠恕接物年四十三卒於郡百姓哀之著有平戎記五卷長子範字宗模早卒三子鑿司空右長史鑿子澤有文學累官尚書左丞舊志載人物

裴叔義仲規弟少有學行高祖末除兗州安東府外兵參

軍累遷太山太守爲政清靜吏民安之遷司空從事中郎正光五年卒年五十七贈征魯將軍秦州刺史諡曰宣子三景融字孔明篤學好屬文正光初 秀才 太學博士永安中秘書監遷輔國將軍 議大夫 終錄事參軍著有文集伯茂另有傳景顏有學尙起家汝南王開府行參軍孝莊初廣州別將行廣漢郡事通志載文苑

裴叔業魏冀州刺史徽之後也五世祖苞晉秦州刺史祖邕自河東居襄陽父順宗兄叔寶仕宋齊有名位叔業少有氣幹頗以將畧自許宋元徽末爲羽林監齊高帝

聞喜縣志

卷之六

人物

四

驃騎行參軍齊初累遷寧蠻長史廣平太守明帝輔政以爲心腹及卽位爲給事黃門侍郎封武昌縣伯魏孝文南次鍾離齊拜徐州刺史以水軍入淮帝令郎中裴聿往與語叔業盛飾服玩聿曰伯父衣服誠爲美麗但恨不晝游爾廢帝卽位徙南兗州刺史會陳顯達圍建鄴遣司馬李元護應之兄子植颺瑜粲等棄母奔壽陽叔業遣信詣豫州刺史薛眞度訪入北之宜眞度答書盛陳朝廷風化乃遣子芬之及兄女夫韋伯昕奉表內附景明元年正月詔授使持節散騎常侍都督豫州刺史征南將軍封蘭陵郡公遣彭城王勰尙書令王肅

接軍未渡淮叔業卒李元護席法友等推叔業兄子植
監州事詔贈驃騎大將軍開府儀同三司諡曰忠武給
東園溫明秘器子舊之字文德仕齊隨郡王左常侍先
卒子譚紹封國祿歲入每以分贍諸叔位輔國將軍中
散大夫卒贈南豫州刺史諡曰敬子測字伯源襲歷通
直散騎侍郎入關西芬之字文馥長厚好施篤愛諸弟
仕齊位羽林監入魏封上蔡伯爲東秦州刺史在州有
清靜稱遷岐州刺史隴賊陷城爲莫折念生所害贈青
州刺史藹之字幼重好琴書其內弟柳諧善鼓琴藹之
師而微不及也位汝陽太守通志載人物

裴彥先叔寶子少儻有大志景明二年歸魏除散騎常
侍封雍邱縣子出爲趙郡太守立政舉大綱不事細務
正始中轉渤海相元愉作逆檄徵郡縣彥先不從執拘
之踰獄得免爲沙門潛行至洛愉平敕還郡延昌中卒
熙平中贈持節左將軍南青州刺史諡曰惠恭弟絢揚
州從事時揚州霖雨水入城絢率城南人數千家泛舟
南走高原避水遂附梁衆潰見獲投水死平陽府志載

人物

裴植字文遠叔寶子少而好學覽綜經史尤長釋典善談
理義叔業卒席法友柳元達等共舉植監州秘叔業喪

問敎命處分皆出於植於是開門納魏軍詔以植爲兗州刺史崇義縣侯入爲大鴻臚卿後以長子昕附南特恕其罪尋授揚州大中正出爲瀛州刺史再遷度支尚書加金紫光祿大夫植嘗言人門不後王肅怪朝廷處之不高及爲尚書欲以政事爲己任謂人曰非我須尚書尚書亦須我嘗表毀征南將軍田益宗不應在百世衣冠之上侍中于忠黃門元昭寢而不奏時忠專權搆成其禍矯詔殺之朝野稱冤臨終神志自若後故吏渤海刁冲上疏訟之贈尚書僕射揚州刺史子惔襲爵通志載人物

裴颺植弟壯果有謀畧在齊以軍功位驍騎將軍入魏爲南司州刺史封義安縣伯詔命未至被害進爵爲侯子炯不得襲封明帝初乃封城平縣伯炯字休光小字黃頭除鎮遠將軍散騎常侍揚州大中正進爵侯改封高城尋兼尚書右丞出爲東郡太守爲賊人所害贈散騎常侍青州刺史諡曰簡炯子斌叅軍斌子堪歷尚書郎通志載人物

裴瑜字文琬颺弟初爲通直散騎常侍封下密縣開國子邑三百戶尋試守滎陽郡以事免後徙封灌津子卒於渤海太守贈豫州刺史諡曰定通志載人物

裴粲字文亮瑜弟景明初賜爵舒縣子沉重善風儀歷正平恒農二郡太守高陽王雍曾以事屬粲粲不從後修謁雍含怒待之粲神情閑邁舉止抑揚雍目之不覺解顏坐事免後宣武欲觀其風度令傳詔就家急召之須臾閒使者相屬合家恒懼粲更恬然神色不變帝嘆異之時僕射高肇以外戚勢傾一時朝士咸望塵拜謁粲唯長揖而已家人尤之粲曰何可自同凡俗也又曾詣清河王懌下車屬暴雨粲容步舒雅不以霑濡改節懌乃令人持蓋覆之歎曰何代無奇人後爲揚州大中正中書令明帝釋奠爲侍講轉金紫光祿大夫節閔初復

爲中書令正月晦帝臨洛濱粲起御前再拜上壽酒帝曰卿昔戒北海以酒今何異於往情粲曰北海志在沉湎故諫其所失陛下齊聖温克敢獻微誠帝爲命酌孝武初出爲驃騎大將軍膠州刺史禱雨海神直據胡床舉杯曰僕白君左右言例皆拜謁粲曰五岳視三公四瀆視諸侯安有方伯致禮海神卒不拜時青州賊耿翔乘其無備掩襲州城尋爲翔害送首於梁子含字文若員外散騎侍郎通志載人物

裴衍字文舒粲弟學識才行優於諸兄兼有將畧以孝友聞初授通直郎歷建興河內二郡太守廉貞善撫二郡

追思之孝昌初曹敬宗寇荊州山蠻應之都督崔暹擁
萬衆盤桓不敢進荊州急詔衍爲別將假前將軍與恒
農太守王羆率萬人出武關戰於淅陽大破之荊州圍
解除持節散騎常侍平東將軍假安東將軍北道都督
鎮鄴西武城封安陽縣開國子邑三百戶時相州刺史
安樂王鑿圖逆行密表陳之適鑿部將稽宗亦馳驛告
變詔衍與都督源子邕李神軌討平之除相州刺史北
道大都督進封臨汝縣伯開國公增邑千二百戶仍詔
與子邕北討葛榮軍次陽平漳曲爲賊敗遇害人心駭
惋贈使持節車騎大將軍司空相州刺史子嵩襲武定
中河內太守嵩子循太原太守篆遼西太守舊志載人
物

裴約字元儉彥先子性剛鯁初爲員外郎轉給事永平中
丹陽太守襲爵冀州大乘賊起勅爲別將行渤海郡事
設法守禦冒矢石身先士卒城陷見害年三十六神龜
中贈平原太守出帝時贈前將軍揚州刺史長子英起
武定末洛州刺史次威起齊王開府中兵叅軍卒贈鴻
臚少卿舊志載人物

裴安祖駿從弟少聰慧八九歲就師講詩至鹿鳴篇語諸
兄云鹿得食相呼而况人乎自此未嘗獨食弱冠州辟

主簿人有兄弟爭財詣州相訟安祖以禮義責讓明日相率謝罪後鄉人勸其仕進安祖曰高尚之事非敢庶幾但京師遼遠實憚於棲遲耳閑居養志不出城邑後孝文幸河東存訪故老安祖朝於蒲坂帝與語甚悅拜安邑令以老病固辭詔給一時俸年八十三卒於家通志載孝義隱逸

裴敬憲字孝虞宣子少有志行學博才清撫訓諸弟專以讀書爲業澹於榮利風期俊遠郡徵功曹不就諸府辟命先進其弟司州牧高陽王雍舉秀才射策高第除太學博士性和雅未嘗失色於人工隸草解音律五言獨

聞喜縣志

卷之六

人物

九

擅一時名聲甚重後進咸宗慕之中山王將之部朝賢送於河梁賦詩言別以敬憲爲最少有氣病年三十三卒人甚悼之敬憲世有德鄉里孝昌中蜀賊陳雙熾所過殘暴至敬憲宅輒約束不得焚燒其爲物所伏如此永興三年贈中書侍郎諡曰文通志載文苑

裴莊伯字孝夏宣次子博識多聞文才與敬憲相亞器度閑雅喜愠不形於色善以約言辨物司空任城王澄辟行參軍甚加知賞年二十一上神龜頌時人異之臨淮王彧北討引爲記室參軍委以章奏及聞敬憲寢疾求假不許遂徑自還亦矜而不問扶持兄病晝夜不離形

容憔悴因莖敬憲遇病卒年二十八兄弟才學知名同年俱喪世共嗟惜之永安三年贈通直散騎侍郎諡曰獻兄弟並無子所著詞藻莫爲集錄弟獻伯廷尉卿濟州刺史少以學尙風流有名京洛爲政傷於嚴但以清白流譽遷殿中尙書卒通志載文苑

裴佗字元化六世祖詵晉太常卿避地涼州東歸居解縣世以文學顯五舉秀才再舉孝廉時人美之父景惠惠州別駕佗容貌魁偉瓚然有氣望少治毛詩春秋周易舉秀才以高第除中書博士累遷考功郎中征西將軍守趙郡威惠甚著狡吏奸人皆改貫所得俸祿分卹貧

窮轉前將軍荊州刺史郡人戀仰傾境餞送蠻酋田盤石田敬宗等部落萬餘家恃險不賓前後牧守未能降欵佗單使宣慰示以禍福敬宗聞風歸附於是合境清晏後加中軍將軍以老乞還卒遺令不聽請贈不受贈襚諸子遵之佗性剛直不好交俗人投分者必當時名流不事家產宅不過三十步又無田園暑不張蓋寒不衣裘其貞儉若此通志載人物

裴延雋字平子魏冀州刺史徽之後也崧子少孤事後母以孝聞涉獵墳史有才筆舉秀才射策高第除著作佐郎累遷太子洗馬又領本邑中正以宮官例免宣武初

爲中書侍郎上專心釋典延雋疏諫除司州別駕時詔立明堂羣官博議延雋獨著一堂之論太傅清河王懌讀而笑曰子故欲遠符僕射也明帝時累遷幽州刺史范陽郡有舊督亢渠徑五十里漁陽燕郡有故戾陵諸塢廣袤三十里皆廢毀多時莫能修復延雋表求營造遂躬自相度隨力分督未幾而就溉田百萬餘畝爲利十倍百姓賴之又令主簿酈惲修起學校禮教大行在州五年考績爲天下最拜太常卿歷七兵殿中二尚書散騎常侍中書令御史中尉又以本官兼侍中吏部尚書後於河陰遇害贈儀同三司都督雍州刺史子元直

聞喜縣志

卷之六

人物

十一

敬猷並有學尚同遇害元直贈光州刺史敬猷超贈尚書僕射通志載人物

裴伯茂叔義次子少有風望學涉羣書文藻富贍釋褐奉朝請大將軍京兆王繼西討引爲鎧曹參軍行臺長孫承業南征絳蜀陳雙熾爲郎中承業還畱知行臺事以平薛鳳賢等封平陽伯再遷散騎常侍典起居注太昌初爲中書侍郎永熙中爲廣平王贊文學後加中軍大將軍伯茂好飲酒頗疎傲曾爲豁情賦天平初還鄴又爲遷都賦二年內宴殿中尚書章成王景哲啓伯茂以藜擊案禁庭內令人挈衣後竟無坐卒年三十九贈散

騎常侍衛將軍度支尚書雍州刺史重贈吏部尚書諡曰文伯茂撰晉書竟未能成嗣子孝才武平末位中書舍人通志載文苑

裴良崧從子字元賓世宗初南絳縣令遷并州安北府長史入爲中散大夫領尚書考功郎中汾州吐京寇薛羽等作亂以良兼尚書左丞爲西北道行臺大破五城郡山寇馮宜都等於雲臺郊又山寇劉蠡升狂獫以良爲汾州刺史加輔國將軍行臺如故良以城人饑窘夜率衆奔西河居西河自良始孝靜初爲魏大將軍太府卿卒於官年六十一贈使持節都督吏部尚書諡曰貞又

聞喜縣志

卷之六

人物

十一

重贈侍中尚書僕射子淑祉太子洗馬居官有聲績位終司空左長史通志載人物

裴慶孫字紹遠良從子性倜儻重然諾正光末爲募人別將討吐京寇薛悉公馬牒騰大戰雲臺郊西賊衆大潰勅徵赴都賊復鳩集北連蠡升南通絳蜀又爲別將從軹關入討深入二百餘里至陽胡城朝廷遂立邵郡因以慶孫爲太守慶孫務安輯之咸來歸業永安中還朝除大中大夫爾朱榮死世隆擁衆北渡詔慶孫爲大都督率衆追擊軍次河內遇害時年三十六慶孫任俠有氣鄉壯士好事者多相依附四方游客恒有百餘與諸

才學士咸相交結是以爲時所稱子瑩永安中太尉行叅軍通志載人物

裴詢字敬叔修子美儀貌多藝能音律博奕咸所嫻解位晉昌太守尙太原長公主特除散騎常侍司徒召爲本邑中正詢讓族叔昉時論善之尋監起居事遷秘書監出爲郢州刺史表蠻酋田樸特爲西郢州刺史及梁將李國興寇邊樸特與部曲爲表裏聲援郢州獲全樸特頗有力焉徵爲七兵尙書武泰中以本官兼侍中爲關中大使未及發於河陰遇害贈司空公諡曰貞烈無子通志載人物

聞喜縣志

卷之六

人物

十二

裴美敬憲從弟務之子少有美名舉秀才咸陽王雅相賞愛欲妻以女美拒不納除奉朝請通志載人物

裴定宗高允爲秘書監定宗與河閒邢祐北平陽嘏廣平程駿金城趙元順等爲著作佐郎俱爲稱職并號長者通志載人物

北齊

裴讓之字士禮佗子少好學有文情年十六喪父殆不勝哀魏天平中舉秀才對策高第累遷屯田主客郎中省中語曰能賦詩裴讓之爲太原公開府記室與楊愔善每清談竟日愔曰此人風流警拔裴文季爲不亡矣梁

使至常令攝主客郎弟諷之奔關右兄弟皆拘繫齊神武問之答曰昔吳蜀二國諸葛兄弟各得盡心况讓之老母在此君臣分定失忠與孝愚夫不爲伏願明公以誠信待物神武善其言兄弟俱釋歷文襄大將軍主簿兼中書舍人後兼散騎常侍聘梁文襄嘗入朝讓之導引儀容蘊藉文襄目之曰士禮佳舍人也遷長史兼中書侍郎領舍人齊受禪流涕歔歔以參掌儀注封寧都縣男除清河太守至都未幾姦吏歛迹盜賊清靖清河豪吏田轉貴孫舍興奸猾多侵削因事脇人取財讓之以其亂法殺之侍中高德政舊與讓之不協密譖於上

楊愔請救文宣大怒曰欲得與裴讓之同冢耶竟賜死
嗣子樊生矩通志載文苑

裴諷之字士正佗次子少好儒學釋褐太學博士嘗從常景借書百卷十許日便返景疑其不能讀每卷策問應對無遺景嘆曰應奉五行俱下襴衡一覽便記今復見之於裴生矣楊愔闔門改葬託諷之頓作十餘墓誌文皆可觀讓之諷之及皇甫和和弟亮並知名洛下語曰諷勝於讓和不如亮司空高乾請爲戶曹參軍不受署大司馬沛王辟記室西魏領軍獨孤信入據金墉號曰洛陽遺彥後居南山洛州刺史王元軌召爲中從事西

師忽至遂入關爲大行臺倉曹郎中卒贈徐州刺史通志載文苑

裴讞之字士平佗第三子七歲勤學早知名累遷司徒主簿楊愔嘆曰河東士族京官不少唯此家兄弟全無鄉音讞之不妄交游唯與隴西辛術趙郡李繪頓邱李構清河崔瞻爲忘年友昭帝末轉儀曹郎儀注喪禮皆能裁正爲許昌太守客旅過郡出私財供給民無所預吏人懷之仕周爲伊川太守通志載文苑

裴謀之字士令佗第四子少有風格邢邵每云我裴四武成中爲開府辟叅軍掌書記通志載文苑

聞喜縣志

卷之六

人物

十五

裴訥之字士言佗第五子純謹有局量弱冠爲平原公開府墨曹掌書記從并州其母在鄴忽得心痛訥之是日不勝思慕心亦驚痛乃請急還當時以爲孝感文宣幸晉陽畱爲齊帥領東宮管記轉太子舍人奏中書舍人事坐杜弼事免官卒大統中追贈平州刺史通志載孝義

北周

裴寬字長寬澄子儀貌瓌偉博涉羣書撫諸弟以篤友聞滎陽鄭孝穆嘗謂從弟文直曰裴長寬兄弟天倫篤睦人之師表吾愛之重之汝可與之游處年十三選孝明

挽郎釋褐員外散騎侍郎孝武西遷寬謂諸弟曰君臣
逆順大義昭然理無東面以虧臣節乃避難大石嶺獨
孤信鎮洛陽始出見焉韋子爽在洛窘急投寬寬開懷
納之信知詰責寬曰窘來見歸義無執送今日獲罪是
所甘心徑赦得不坐大統五年授都督同軌防長史加
征魯將軍十三年從防主韋法保向潁川解侯景圍謂
法保曰侯景狡猾必不肯入關若伏兵斬之亦一時之
功也不然湏深加嚴警不得信其誑誘自貽後悔法保
乃加警十四年與東魏將彭樂恂戰新城被擒見齊文
襄寬舉止詳雅善占對文襄甚賞異之厚加禮遇寬乃

裁所卧羶夜縋而出因得遁還周文帝曰披堅執銳或
有其人疾風勁草歲寒方驗裴長寬爲高澄厚遇乃能
冒死歸我雖竹帛所載何以加之乃手書署寬名下授
持節都督封夏陽縣男卽除孔城城主十六年遷河南
郡守仍鎮孔城進使持節車騎大將軍儀同三司散騎
常侍周初進爵子寬在孔城十三年與齊洛州刺史獨
孤永業相對永業有計謀多詭詐寬每揣知其情邀擊
無不克天和三年除温州刺史復以沔州接敵境移寬
爲刺史陳將程靈洗攻之力屈城陷執至揚州卒於江
左子義宣後使陳始得還柩隋開皇元年贈襄郢二州

刺史義宣位司金二命士合江令通志載人物

裴漢字仲霄寬弟操尚宏雅聰敏好學嘗見人作百字詩一覽便背誦魏孝武初解褐員外散騎侍郎大統五年除大丞相府士曹行叅軍轉墨曹漢善尺牘尤便簿領理識明贍斷剖如流相府語曰日下燦爛有裴漢武成中爲司車路下大夫叅議格令有條理天和五年加車騎大將軍儀同三司晉公護擅權漢直道自守八年不徙雅好賓游每良時美景必招引時彥宴賞畱連閒以篇什自寬沒後遂斷絕游從不聽琴瑟歲時哀慟而已撫養兄弟子情甚篤至借人異書必躬自錄本疾疢未嘗釋卷卒贈晉州刺史子鏡人少聰明涉獵經史爲大將軍譚公會記室叅軍累遷春官府都上士仕隋位兵曹郎通志載孝義又載文苑

裴尼字景尼寬弟宏雅有氣度起家奉朝請除梁王東閣祭酒從事中郎加散騎常侍隴西李際范陽盧誕名傾一時咸與尼爲忘年友魏恭帝元年以本官從于謹平江陵大獲軍實謹恣諸將校取之人爭珍玩尼惟藏梁元帝素琴一張謹嘆異之拜御正下大夫卒贈輔國將軍隨州刺史子之隱趙王府記室叅軍梓州長史司農少卿會稽縣男諡曰安弟師人好學有度秦王府記室

參軍兼侍郎

裴果字戎昭祖思賢魏青州刺史父遵齊州刺史果少慷慨有志畧魏太昌中爲陽平郡丞周文帝使并州與果遇果知非常人密託附焉永安末從軍征討乘黃驄馬衣青袍每先登陷陣時人號爲黃驄少年永熙中授河北郡守沙苑敗率宗黨歸闕周文嘉之賜田宅奴婢牛馬什物從戰河橋解玉璧圍摧鋒奮擊所向披靡大統九年從戰芒山陷陣擒東魏都督賀婁烏邏蘭勇冠當時周文愈親待之補帳內都督遷帥都督平東將軍後從開府楊忠平隋安陸以功加大都督除正平郡守正

平果本郡也以威猛爲政百姓畏之盜賊屏息遷司農卿又從尉遲迥伐蜀爲前軍開劔閣破季慶堡降楊乾運皆有功廢帝三年授龍州刺史封冠軍縣侯俄而州人張遁李拓驅百姓圍州城果設方畧以拒之賊退走出兵追擊累戰破之轉陵州刺史周初除隆州刺史加持節驃騎大將軍開府儀同三司進公歷眉復二州刺史果性嚴猛能斷決抑挫豪右申理屈滯歷牧數州號爲稱職卒贈本官加絳晉建三州刺史諡曰質子孝仁嗣孝仁幼聰敏涉獵經史有譽於時起家舍人上士累遷長寧鎮將扞禦齊人有威畧歷建譙亳三州刺史通

志載人物

裴俠字嵩和祖思齊舉秀才拜議郎父西河郡守贈晉州刺史俠志識聰慧年十三父憂哀毀若成人州辟主簿舉秀才魏正光中解巾奉朝請稍遷義陽郡守元顥入洛執其使焚其赦書孝莊嘉之授東郡太守帶防城別將及孝武徵兵俠率所部赴洛陽武衛將軍王思政問之俠白圖歡有立至之憂西巡有將來之慮且至關右徐思其宜耳思政乃進俠於魏主授左中郎將及西遷俠將行而妻子猶在東郡滎陽鄭偉曰何如東就妻子徐擇木焉俠曰既食其祿寧以妻子易圖也遂從入

聞喜縣志

卷之六

人物

十九

關賜爵清河縣除丞相府士曹參軍大統三年領鄉兵從戰沙苑先鋒陣俠本名協至是周文帝曰仁者必勇因命名俠以功進侯王思政鎮玉璧爲長史草思政報齊神武書甚壯烈周文善之曰雖魯仲連無以加也除河北郡守躬履儉素愛人如子與諸牧守上謁周文令清慎如俠者同立衆無敢應號獨立使君又撰九世伯祖貞侯潛傳裴氏清公從弟伯鳳世彥笑曰人生仕進須聲名並裕何清苦若此俠曰夫清者泣職之本儉者持身之基况我大宗世濟其美故能存見稱於朝廷沒流芳於典策今吾濫蒙殊遇固其窮困非慕名

也志在自修懼辱先也再遷郢州刺史加儀同三司梁
竟陵守孫暉鄴城守張建並以郡來附俠密謂人曰暉
目動言肆且輕於去就建神情審定當無異心乃馳啓
其狀鄴城竟不遣監統暉還以郢叛卒如俠言轉大將
軍拓州刺史徵拜雍州別駕周初除司邑下大夫加驃
騎大將軍開府儀同三司進公遷戶部中大夫奸吏隱
沒或至千萬勵精發摘數旬內奸盜畧盡轉工部中大
夫掌錢物典李貴悲泣或問之對曰官物多費用裴公
清嚴有名懼遭罪責耳俠許其自首俠嘗遇疾沉頓忽
聞五鼓便卽驚起顧左右曰可向府所苦因此而瘳司

空宇文貴小司空申徵來候俠疾所居第屋不免霜露
貴等還言之上爲起宅並賜良田十頃卒於位贈太子
少師蒲州刺史諡曰貞子祥性忠謹有理劇才少爲成
都令清不及俠斷決過之後除長安令爲權貴所憚遷
司倉下大夫通志載人物

裴文舉邃子少忠謹涉獵經史大統十年起家奉朝請周
文帝子盛簡賓友文舉選與諸公子游雅相欽敬未嘗
戲狎遷著作郎中外府叅軍恭帝二年賜姓賀蘭氏周
初襲爵澄城縣子齊公憲開幕府爲司錄憲出鎮劔南
復爲總管府中郎武成二年就加使持節車騎大將軍

儀同三司蜀土沃饒或勸以利答曰利之爲貴莫若安
身身安則道隆非貨之謂是以不爲非惡財也憲矜其
貧婁每欲資給之文舉恒自謙遜辭多受少保定三年
遷絳州刺史廉約自守一遵父邃任正平遺範百姓美
而化之總管韋孝寬特相欽重每與談論不覺膝前於
席天和初進驃騎大將軍開府儀同三司尋爲孝寬柱
國府司馬六年入爲司憲中大夫進爵伯轉軍司馬文
舉與弟璣友愛璣早亡撫視遺孤逾於己子文舉叔父
季和爲曲沃令卒於聞喜涑川叔母韋氏卒於正平縣
屬東西分隔州人感文舉孝義潛以韋柩歸涑川合葬

之六年除南青州刺史宣政元年卒於位子胄襲爵位
至大都督通志載人物

裴藻字文芳少機辯有不羈之志爲子如太傅主簿消難
鎮北豫又以爲中兵參軍入周封聞喜縣男除晉州刺
史通志載人物

裴鴻智鳴鳳子恭謹有幹畧歷官內外孝閔踐祚除輔城
公司馬加儀同三司爲晉公護雍州治中遷御正大夫
進開府儀同三司轉民部中大夫保定末出爲忠州刺
史九曲城主鎮守邊鄙甚有捍禦之能衛公直出鎮襄
州以鴻智爲司馬天和初拜郢州刺史轉襄州總管府

長史賜高邑縣侯從直南征軍敗沒於陣贈豐資遂三
州刺史通志載人物

隋

裴肅字神封俠子貞亮有才藝少與安定梁毗同志友善
天和中舉秀才累遷御正下大夫以行軍長史從韋孝
寬征淮南隋初杜門不出開皇五年授膳部侍郎歷朔
州總管長史貝州長史俱有能名仁壽中上書言高頴
天挺良才元勳佐命願錄其大功忘共小過二庶人得
罪已以願各封小國若得遷善漸更增益書奏上謂楊
素曰肅憂我家事如此亦至誠也徵入朝見於含章殿
聞喜縣志

卷之六

人物

二十二

罷遣之大業中久不得調復杜門後執政希旨授永平
郡丞甚得爨人心歲餘卒爨獠思之爲立廟於漳江之
浦有子尚賢通志載人物

裴政字德表高祖壽孫從宋武帝徙壽陽歷前軍長史廬
江太守祖邃父之禮政幼明敏博聞強記達於時政年
十五辟邵陵王府法曹叅軍事轉起部郎枝江令湘吏
王召爲宣惠府記室尋除通直散騎侍郎加壯武將軍
帥師隨王琳討侯景擒賊帥宋子仙旋爲先鋒入建鄴
以軍功連最封夷陵侯徵授給事黃門侍郎復副王琳
拒蕭紀破之於硤口加平越中郎將鎮南府長史周師

圍荊州琳自桂州來赴難政請從閒道先報至百里洲
爲周人所獲蕭譽說之鑠送至城下使謂元帝曰王僧
辯已自爲帝王琳不復能來政許之旣而告城中曰援
兵大至各思自勉吾被擒當碎身報國譽命趣行戮蔡
大業諫曰此民望也若殺之則荊州不可下矣因得釋
會江陵陷送關中周文帝聞其忠授員外散騎侍郎引
事相府命與盧辯依周禮建六官尋授刑部下大夫轉
少司憲政明習故事又叅定周律簿案盈几剖決如流
用法寬平囚犯極刑者許妻子入獄就之又善鐘律嘗
與長孫紹遠論樂宣帝時免隋高祖攝政召復官開皇

元年轉率更令加上儀同三司詔與蘇威等修定律令
政採魏晉刑典下至齊梁沿革輕重取其折衷同撰者
十餘人皆取決於政進散騎常侍轉左庶子多所匡正
東宮大事皆委之通事舍人趙元愷作武職辭見帳未
成劉榮語元愷云但爾口奏不須造帳後榮諱無此語
付政推問附榮者言政欲陷榮太子召政責之政奏曰
凡推事有兩一察情一據證審其曲直以定是非臣察
劉榮位高任重縱令實語元愷蓋纖介之僣計理而論
不須隱諱又察元愷受制於榮豈敢以無端之言妄相
點累二人之情理正相似元愷引左衛率崔蒨等爲證

蒨等欵狀悉與元愷符同察情既敵湏以證定臣謂榮語元愷事必非虛太子稱政平直政好面折人短而退無後言時雲定興數入侍政數切諫又謂定興曰公所爲不合禮度又元妃暴薨道路藉藉非令名也願公自引退不然將及禍興怒告太子太子益疎政出爲襄州總管妻子不之官秩俸散給僚吏民犯罪者悉知之或竟歲不發至再三犯乃因都會時親案其罪五人處死流徙者甚衆合境懾服稱爲神明卒於官年八十九著有隋律令承聖降錄十卷後高祖追憶曰向遣裴政劉行本在匡弼承華應不至此子南金有文藻以輕財貴

聞喜縣志

卷之六

人物

一二十四

義稱官至繕部郎中通志載文苑

裴仁基字德本祖伯鳳周汾州刺史父定高上儀同三司仁基少驍武便弓馬伐陳以親衛從先登陷陣拜儀同賜物千段領漢王諒府親信諒反仁基苦諫見囚諒敗超拜護軍改授武賁郎將從李景討蠻向思多於黔安以功進銀青光祿大夫擊破吐谷渾加金紫光祿大夫獲寇掠靺鞨拜左光祿大夫從征高麗進光祿大夫李密據洛口令爲河南道討捕大使據武牢所得軍資卽用分賞監軍御史蕭懷靜持仁基長短仁基懼殺懷靜歸密密以爲河東郡公子行儼驍勇善戰復以爲絳郡

公王世充詣偃師求決戰仁基曰世充盡銳而至洛下必虛可分兵守其要路令不得東簡精兵三萬傍河西出以逼東都世充却還我且按甲世充重出我又逼之如此則我有餘力彼勞奔命兵法所謂彼出我歸彼歸我出數戰以疲之多方以誤之者也密諸將皆請戰仁基苦爭不得戰遂大敗仁基爲世充所擄深禮之以兄女妻行儼後與宇文儒章等謀劫世充行儼以兵應之事定然後輔越王侗臨發俱爲世充所殺通志載人物裴矩字洪大原名世矩後入唐避諱去世訥之子好學有智數世父讓之曰汝神識足成才士欲求宦達當資幹

世之務矩由是畱情世事仕齊高平王文學入周隋文帝爲定州總管補記室憂歸召參相府記室事隋初遷給事郎奏舍人事伐陳領元帥記室令與高穎收陳圖籍明年詔巡撫嶺南高智慧汪文進等梗道矩請速進行至南康得兵數千人時俚帥王仲宣逼廣州遣其部將周師舉圍東衡州矩與大將軍鹿愿赴之擊破大庾嶺九柵賊釋東衡州據原長嶺又擊敗之遂斬師舉進拔廣州仲宣懼而潰散矩綏輯二十餘州署渠帥爲刺史縣令及還上命升殿謂高穎楊素曰裴矩以三千疲卒徑至南海有臣若此朕亦何憂以功拜開府賜爵聞

喜縣公賫物二千段除戶部侍郎遷內史侍郎請出使
說突厥都藍顯戮其妻宇文氏史萬歲爲行軍總管出
定襄道矩爲行軍長史破達頭於塞外又令撫慰啓民
還爲尚書左丞轉吏部侍郎大業初令掌張掖交市事
矩誘諸 令言其國俗山川險易撰西域圖記三卷入
朝奏之賜物五百段後遷黃門侍郎復令往張掖引致
西番至者十餘國三年有事於恒嶽咸來助祭復往燉
煌遣使說高昌王鞠伯雅及伊吾吐屯設等導使入朝
及上征吐谷渾次燕支山高昌王伊吾設與西番二十
七國謁於道左皆令佩金玉被錦罽焚香奏樂復令張

掖武威士女盛飾縱觀以示中國之盛竟破吐谷渾遣
兵戍之進位銀青光祿大夫薛世雄城伊吾矩共往經
畧諭西域諸國曰天子爲番人交易懸遠故城伊吾耳
還賜錢四十萬矩又請反閒射匱潛攻處羅後處羅竟
入朝從幸啓民帳見高麗使請脇令其王入朝高元不
用命始建東征之策及伐高麗領武賁郎將明年復從
至遼令監掌兵事進位右光祿大夫時文武多以賄聞
唯矩無贓穢之響後安集隴右令曷薩那部掠吐谷渾
獻策分始畢勢以宗女嫁其弟叱吉設拜爲南面可汗
叱吉不敢受又誘史蜀 悉互市伏兵馬邑斬之十一

年北巡有鴈門之役詔宿朝堂以待顧問尋從南幸奏
四方盜起請鑾輿早還後入竇建德畱守洛州與曹旦
舉山東地歸唐授左庶子轉詹事戶部尚書卒諡曰敬
著有高麗風俗一卷西域圖記三卷隋開業平陳記十
二卷鄴都故事十卷唐書一百卷大唐宰相表二卷大
唐書儀十卷子宣機光祿大夫禮部尚書聞喜公宣化
縣令通志載人物

裴子通爲隋大中大夫哭母喪明白烏巢於冢樾兄弟八
人皆有孝行詔表世爲義門裴氏通志載孝義

裴脊字歸厚叔業五世孫大業中爲淮安司戶叅軍郡人

聞喜縣志

卷之六

人物

一二十七

楊琳田瓚等亂劫吏多死惟脊以仁愛賊不忍犯護送
還鄉通志載人物

裴晞文中子舅受詩於文中子嘗問穆公之事文中子曰
舅氏不聞鳳凰乎覽德輝而下何必懷彼也通志載文

苑

唐

裴寂字元真仕隋歷侍御史晉陽宮副監高祖畱守太原
與寂舊好寂白高祖曰今天下大亂若舉義旗必得大
位高祖從之建大將軍府以寂爲長史賜爵聞喜縣公
從至河東三輔豪俊歸義者千計又陳符命十餘事高

祖乃命定儀禮卽位拜尚書右僕射呼爲裴監不名又聘寂女爲趙王元景妃累遷司空魏國公加封五百戶武德九年詔寂册立太宗告天南郊貞觀元年加實封年六十卒贈相州刺史工部尚書河東郡公著有隋夫業律十八卷唐武德律十二卷式十四卷令二十一卷子律師尚臨海公主汴州刺史法師全吾將軍律師子承先武后時殿中監俱襲爵平陽府志載人物

王景嵩值夏縣呂崇茂反宋金剛又寇澧州景嵩率鄉黨千餘人據險抗賊卒獲保全太宗嘉之命檢校桐鄉令不受改爲驃騎將軍又不受高祖聞而徵之及見勞之

聞喜縣志

卷之六

人物

二十八

曰卿固守忠誠克全鄉曲國有常典所以授卿每辭不受何也景嵩對曰桐臣鄉也拒逆臣分也不敢爲功故辭高祖善其對封桐鄉男加位開府通志載孝義

裴敬燹子通曾孫七歲能文章性謹敏宗族重之號甘露頂父臨黃令智周爲下所訟敬燹年十四詣巡察使唐臨直枉臨奇之試命作賦賦工父罪已釋表敬燹於朝補陳王府典籤一日心悸而痛急倍道歸而父已卒羸毀踰禮乾封初累遷監察御史母病醫瘳不能乘敬燹自爲輿往迎居喪詔贈縑帛官爲作靈輦終服以著作郎兼修國史歷中書舍人太子左庶子武后時酷吏陷

之歿於嶺南唐書列孝友傳明永樂間編入孝順事實
祀鄉賢通志載孝義

裴琰之永徽中爲同州司戶參軍年甚少刺史李宗義初
輕之諭曰同吏事繁子盍求便官母畱此琰之唯唯吏
白積案數百崇義讓使趨斷琰之曰何至逼人乃命吏
連紙進筆爲省決一日畢予奪當理而筆詞勁妙崇義
驚曰子何自晦成吾過耶由是名動一州號霹靂手後
爲永年令有惠政吏刻石頌美以倉部郎中終通志載
人物

裴行儉字守約忠公仁 子幼以廕補宏文生貞觀中舉

聞喜縣志

卷之六

人物

二十九

明經調左屯衛倉曹參軍大將軍蘇定方謂曰吾用兵
世無可教者今子也賢乃盡畀以術遷長安令武昭儀
將立與長孫無忌褚遂良秘議語泄左除西州都督府
長史麟德二年累擢安西都護西域諸國多歸附召爲
司文少卿遷吏部侍郎與李敬元馬載同典選有能名
時號裴馬亦云裴李行儉始設長名榜銓注等法又定
州縣升降資擬高下爲故事上元三年出爲洮州道左
二軍總管改秦州右軍儀鳳二年十姓阿史那都支及
李遮匄誘番落以動安西詔討之行儉曰吐番方熾敬
元失律審禮喪元安可更生事今波斯王死其子泥涅

師 京師如遣使立之卽路出二番權以制事可也詔册送波斯王且爲安撫大食使徑莫賀延磧風礫晝冥導者迷路將士饑渴行儉止營致祭令曰水泉非遠衆少安俄而雲徹風恬行數百步水草豐美後來者莫識其處衆皆驚以方漢貳師將軍至西州諸番郊迎行儉召豪傑千餘人自隨揚言大熟未可進宜駐軍須秋方可漸行都支覘知之不設備行儉徐召四鎮酋長僞約畋曰吾念此樂未始忘孰能從予獵於是子弟願從者萬人乃陰勒部伍數日倍道進去都支帳十餘里先遣問都支安否外若閒暇非討襲者又使人趨召都支都

支本與遮匄計及秋拒使者已而聞軍至倉卒不知所出率子弟五百餘人詣營謁遂擒之是日傳契箭召諸部酋長悉來請命並執送碎葉城簡精騎約齎襲遮匄道獲遮匄使釋令前往諭其主并言擒都支狀遮匄乃降將吏爲刻石碎葉城以紀功俘至上親勞賜宴曰行儉提孤軍深入萬里兵不血刃而叛黨擒夷可謂文武兼備矣其兼授二職卽拜禮部尙書兼檢校右衛大將軍調露元年突厥阿史德温傅叛單于管二十四州應之衆數十萬都護蕭嗣業敗死詔行儉爲定襄道行軍大總管討之先是嗣業饋糧數被寇鈔軍餒死行儉因

詐爲糧車三百乘伏壯士伍百齎陌刀勁弩以羸兵挽進又伏精兵踵其後寇果掠車羸兵走賊驅就水草解鞍牧馬取糧車中而壯士突出伏兵又至殺獲幾盡自是糧車無敢近者大軍次單于北暮立營塹壕旣周更命徙營高岡比夜風雨暴至前占營所水深丈餘衆莫不駭問行儉曰自今第如我節制毋問所以知也賊拒黑山數戰皆敗行儉縱兵前後殺虜不勝計僞可汗泥熟匐爲其下所殺持首來降又擒大首領奉職而還餘黨走狼山阿史那伏念僞稱可汗復與温傳合明年行儉總諸軍頓代州之陁口縱反閒說伏念令與温傳貳

伏念密送款且請縛温傳自効行儉秘不布密以聞後數日烟塵障天而南斥堠惶駭行儉曰此伏念執温傳來降也顧受降如受敵乃勅嚴備遣單使徃勞旣而果降突厥餘黨悉平上悅遣戶部尚書崔知悌勞軍初行儉許伏念以不死侍中裴炎害其功卒議斬伏念及温傳於都市行儉功不錄封聞喜縣公行儉歎曰渾濬之事古今恥之但恐殺降則後無復來矣遂稱疾不出永淳元年復爲金山道大總管未行卒年六十四贈幽州都督諡曰憲詔遣官護視家事子能立乃停中宗初再贈揚州大都督行儉工草隸爲營陣部伍料勝負別器

能等四十六訣通陰陽歷術每戰豫道勝日善知人在
吏部見蘇味道王劇曰二君後皆掌銓衡李敬元盛稱
王勃楊炯盧照鄰駱賓王之才行儉曰士之致遠先器
識後文藝如勃等雖有才而浮躁銜露豈享爵祿者哉
炯頗沉默可至令長餘皆不得其死後咸如所料所引
偏裨皆爲世名將僂奏至刺史將軍者數十人常賜馬
及珍鞍令史私馳馬馬蹶鞍壞懼而逃召還之不加罪
初平都支遮匐獲瓌寶不貲有碼碯盤廣二尺軍吏趨
跌盤碎惶怖叩頭流血行儉笑曰爾非故也何至是色
不少吝上賜都支資產皿金三十餘物橐駝馬牛稱是

分給親故泊麾下數日輒盡著有文集二十卷選譜十
卷安置軍營行陣等四十六訣一卷草書雜體祀鄉賢
通志載人物

裴炎字子隆大同子寬厚寡言笑有奇節補宏文生休澣
讀書不廢嘗以業未就辭薦服勤十年尤通左氏春秋
舉明經及第補濮州司倉叅軍歷御史起居舍人遷黃
門侍郎調露元年同中書門下三品進拜侍中上幸東
都畱皇太子京師以炎調護太子監國及中宗立改中
書令以令執政事筆徙政事堂於中書省中宗欲以后
父韋元正爲侍中及授乳媪子五品官炎固執不從由

是豫王嗣位以定策功封永清縣男武承嗣請立七廟追王其先炎諫曰爲天下母宜存至公不容追王祖考示自私且獨不見呂氏事乎承嗣又欲害韓王元嘉魯王靈夔炎固爭未幾賜爵河東縣侯炎謀承武后出游龍門還政於上會以雨不出徐敬業兵興議討之炎曰今若復子明辟賊不討而解御史崔譽搆之捕送獄鳳閣侍郎胡元範曰炎社稷臣有功於國悉心事上天下所知臣明其無異圖納言劉齊賢左衛率蔣儼繼辯之竟被害於都亭驛炎被劾卒不折節籍其家無儋石之贏睿宗初贈太尉益州大都督諡曰忠通志載人物

裴佖先炎從子廕太僕丞後坐流嶺南上因變求面陳得失后召見之盛氣待之曰炎法當誅尙何道對曰陛下唐家婦今雖臨朝當責任大臣須東宮年就德成復子明辟柰何遽王諸武炎爲唐忠臣而戮逮子孫海內憤怨臣愚謂宜還東宮罷諸武權不然豪傑乘時而動不可不懼命杖之長流灤州又流北庭五年貲至數十萬自北庭屬京師多其客詞事十常知七八時詔慰安流人實命殺之佖先前知逃奔遂械繫獄都護以狀聞會更遣使安撫十道繇是佖先得不死中宗復位求炎後授太子詹事亟遷秦桂廣三州都督坐累免後擢范陽

節度使太原京兆尹奏罷畿縣員外及試官進工部尚書年八十六以東京畱守累封翼城縣公卒於官通志載人物

裴居道熙載子隋兵部侍郎以女爲太子妃則天時歷位納言內史太子少保封冀國公載初元年爲酷吏所陷下獄死著有垂拱式二十卷格十卷新格二卷散頒格三卷畱司格六卷通志載人物

裴行立起居郎中中書令僑卿孫刑部尚書伯言子重然諾舉動有法母亡泣血幾毀以軍勞累授沁州刺史遷衛尉少卿口陳願治民除河東令寬猛時當由蘄州刺

聞喜縣志

卷之六

人物

三十四

史遷安南經畧使環王國叛人李樂山來乞兵行立不受命部將杜英策討斬之歸其孥蠻人悅服英策及范廷芝皆谿洞豪也行立陰把其罪陽貸之許自効故能得英策死力廷芝嘗休沐久不還行立約曰異時復然爾且死後踰期笞殺之於是威肅風行徙桂管觀察使黃家洞賊叛討平之俄爲安南都護召還道卒年四十七贈右散騎常侍通志載人物

裴光庭字連城行儉子早孤母庫狄氏有婦德武后召入宮爲御正光庭累遷太常丞坐武三思壻貶郢州司馬開元中擢兵部郎中鴻臚少卿以職業稱元宗有事岱

宗中書令張說恐塞外乘閒竊發召光庭謀守邊對曰封禪所以告成功今將告成而懼戎狄非昭德也夫諸番突厥爲大近願修和好若遣一使召其大臣使赴行在必欣然應命諸番君長將相率而來我偃旗息鼓不復事矣說曰善吾所不及因奏用其策突厥果遣使來朝東封還遷兵部侍郎久之拜中書侍郎同中書門下平章事兼御史大夫遷黃門侍郎拜侍中兼吏部尚書弘文館學士撰瑤山往則維城前軌二篇獻之手制褒美召皇太子諸王謝規諷意光庭又引文學士直弘文館撰續春秋經傳自戰國訖隋表請上修經光庭等作

傳未就時有建言唐爲金德者百官普議光庭以符命表著不可改亟奏罷之二十年封正平縣男初知星者言大臣不利使襁之光庭曰使禍可襁而去則福可祝而來也論者以爲知命卒年五十八贈太師諡曰克平特賜諡曰忠獻詔中書令張九齡文其碑光庭著有開元格令科要一卷刪次格後長行勅六卷並瑤山往則一卷維城前軌一卷通志載人物

裴懷古嘗懷輯姚雋諸蠻歸者日千計又使於突厥抗節不少挫徙居壽春爲并州都督長史吏民懷之後召去再爲并州州民扶老携幼出迎時稱清介終左威衛大

將軍通志載人物

裴說行儉從子擢進士第累官禮部員外郎以詩名世著有修文異名錄十一卷詩一卷通志載文苑

裴寬袁州刺史靜慮子性通敏工騎射通書記景雲中爲潤州叅軍事刺史韋詵有女擇所宜歸會人以鹿餉寬寬不以苞苴污家乃瘞後圃詵聞嗟異引爲按察判官妻以女尋舉拔萃爲河南丞遷長安尉宇文融括天下田奏爲江東覆田判官改太常博士禮部建言忌日應用樂寬自以情立議曰廟尊忌卑則作樂廟卑忌尊則備而不奏中書令張說請如寬議遷刑部員外郎萬騎

聞喜縣志

卷之六

人物

二十六

將軍馬崇殺人王毛仲將鬻其獄固執不肯從河西節度使蕭嵩表爲判官歷兵部侍郎宰相裴耀卿領江淮運奏爲戶部侍郎自副遷吏部出爲蒲州刺史州久旱寬入境輒雨徙河南尹不屈司權貴河南大治由金吾大將軍授太原尹元宗賦詩褒餞有云德比嶽雲布心同汾水清天寶初由陳畱太守拜范陽節度使北平軍使烏承恩數冒賄寬以法繩治檀州刺史何僧獻生口數十寬悉歸之夷夏感附爲戶部尚書兼御史大夫裴敦復平海賊還廣張功簿寬密白其妄會河北部將盛譽寬政上嗟賞睠倚加厚李林甫恐其遂相又惡寬善

李適之乃漏寬語以激敦復敦復以金五百兩賂貴妃姊搆寬請屬事貶睢陽太守後坐韋堅親貶安陸別駕稍遷東海太守徙馮翊入爲禮部尚書卒年七十五贈太子太傅寬兄弟八人皆擢明經任臺省州刺史雅性友愛於東都治第八院相對甥姪亦有名稱常擊鼓會飯當時榮之其爲政務清簡世皆冀其得宰相天寶閒稱舊德以寬爲首弟朗左司郎中兼侍御史子諝祀鄉賢通志載人物

裴千鈞字孝卿天寶閒祿山亂開府趙某縮甲鼓鐘以候鈞仗戈從之志宣臣節相國李林甫命本道行軍司馬

聞喜縣志

卷之六

人物

三十七

殿中侍御史劉公頓兵社稷假以飛鳧之職責以扉屨之費鈞不撓法度刑人無咨不匱軍給時議能之後除萬泉令仍賜紫金魚袋鈞雅好賓客尤喜忠良聞人有養親乏甘旨者分俸贍之載裴氏世牒

裴淮琰之子侍父以疾十餘年不肯仕父歿始擢明經調陳畱主簿遷監察御史崔湜鄭愔坐奸贓詔淮按訊執正其罪天下稱之累進中書舍人睿宗造金仙玉真二觀旱甚役不止淮上疏諫不報遷兵部侍郎以銓總勞特授一子官開元五年爲吏部侍郎甄拔士爲多拜御史大夫淮善張說說數薦之而雅長於敷奏上嘉重焉

擢吏部尚書改太子賓客卒贈禮部尚書諡曰懿著有
刪定開元後格十四卷式二十卷通志載人物

裴積光庭子以廢累遷起居郎開元末壽王瑊將立爲儲
貳積陳申生戾園禍以諫上改容謝之授給事中積辭
上善其讓授祠部員外郎卒子倩字容卿歷信州刺史
勸民墾田二萬畝以治行賜金紫服爲度支郎中卒諡
曰節通志載人物

裴冕字章甫長安丞紀子元宗朝以廢補渭南尉京畿採
訪使王鉷表署判官旣而譖毀之鉷弟錡坐大逆詞及
鉷冕自下位抗言其誣錡死李林甫用事寮屬引去賓

聞喜縣志

卷之六

人物

三十八

客無敢窺其門獨冕爲殮葬時論義之河西節度使哥
舒翰辟行軍司馬天寶十五年元宗幸蜀太子入平涼
建寧王倓曰裴冕衣冠名族必無二心速往就之上策
也於是軍聲稍振召太子爲天下兵馬元帥拜冕御史
中丞兼左庶子副之與杜鴻漸崔漪等上箋請遵馬嵬
之命卽皇帝位箋五上太子卽位靈武進冕中書侍郎
同中書門下平章事封冀國公後中書舍人劉烜李輔
國私人也冕表言抵法坐貶施州刺史徙澧州大歷四
年郭子儀言於上曰冕首佐先帝馳驅靈武有社稷功
爲程元振忌貶海內寃之俾復輔國必能致治遂拜左

同中書門下平章事旬有二日兼河南江淮副元帥東都留守是月卒於長安年六十七翼日冊贈太尉配享肅宗廟上元閒兵部尚書李輔國求爲相諷冕薦己冕不從程元振僭用威柄有導從虎賁儀觀甚都冕停車致詰嘗北使殊俗單于君長稽顙屈膝元載爲作神道碑平陽府志載人物

裴遵慶字少良幼彊學該綜圖傳外晦內明不干當世年既長始以廕爲興寧丞調大理丞邊將蕭克濟督役苛暴役者有醜言有司以不軌論遵慶全救數十族擢吏部員外郎判南曹天寶時選者歲萬計遵慶性强敏視

簿牒詳而不苛世稱銓事第一肅宗時爲吏部侍郎蕭華輔政屢薦之拜黃門侍郎同中書門下平章事代宗初以遵慶忠厚大臣奉詔宣慰僕固懷恩懷恩將入朝既而爲其將范志誠沮之遵慶脫身赴行在遷太子少傅罷爲集賢院待制改吏部尚書以尚書右僕射復知選事朝廷優其老聽就第注官時以爲榮大歷十年卒年九十餘遵慶性惇正老而彌謹每薦賢有來謝者以爲耻諫而見從益畏卽削其疏藁雖親近莫知所言識者以爲得大臣體著有王政記述古今治體集子向向子寅御史大夫寅子樞通志載人物

裴諝字士明寬子擢明經調河南叅軍事累遷京兆倉曹叅軍虢王巨表署襄鄧營田判官母喪居東都史思明故爲寬將及入洛迹獲之呼爲郎君僞授御史中丞賊殘宗室諝隱緩之全活數百人又嘗疏賊虛實於朝事泄僅免賊平除太子中允遷考功郎中數奏事代宗幸陝徒步挾考功南曹印赴行在上曰疾風知勁草果可信將用爲御史中丞爲元載沮却拜河東租庸鹽鉄使入計上問權酷利歲出內幾何諝久不對上復問曰臣有所思上曰何邪諝曰臣自河東來涉三百里而農人愁嘆穀菽未種誠謂陛下軫念元元先訪疾苦而乃責

臣以利故未敢卽對上曰微公言朕不聞此拜左司郎中數訪政事載忌之出爲虔州刺史歷饒廬亳三州除右金吾將軍德宗將葢陵事禁屠殺尙父郭子儀家奴宰羊諝列奏上謂不畏彊禦善之或曰尙父有社稷功豈不爲庇乎諝笑曰非君所知尙父方貴盛上新卽位必謂黨附者衆今發其細過以明不恃權耳吾上以盡事君之道下以安大臣不亦可乎時朝堂別置三司辯爭者輒擊登聞鼓諝上疏曰諫鼓榜木之設所以達幽枉延直言今詭猾之人輕動天聽爭纖微若然者安用吏治乎上然之乃悉歸有司諝惡法吏舞文或挾宿怨

爲重輕獻獄官箴以諷坐事貶閬州司馬俄召爲太子右庶子進兵部侍郎至河南尹東都副畱守凡五世爲河南謂視事未嘗敢當正處以寬厚和易爲治不鞫人以贓卒年七十五贈禮部尚書通志載人物

裴胄字印叔寬從子擢明經佐李抱玉鳳翔幕府謝歸更從宣歙觀察使陳少游抱玉劾貶桐廬尉時李栖筠觀察浙西幕府皆一時高選判官許鳴謙名知人見崔造及胄器之白栖筠取爲支使栖筠爲御史大夫引胄爲殿中侍御史爲元載所惡會栖筠卒胄護喪歸洛人危之胄屹然不沮惴少游復表淮南觀察判官載誅始拜

聞喜縣志

卷之六

人物

四十一

刑部員外郎遷宣州刺史楊炎爲載復讐會胄部人積胄雜俸爲贓炎遣員寓蔓劾貶汀州司馬稍遷京兆少尹以父名不拜換國子司業遷江西觀察使初李兼嘗罷南昌卒千餘人收資廩爲月進胄白罷之德宗雅記胄才遂拜荆南節度使待中使有節獻餉直不數金宴勞止三爵卒年七十五贈尚書右僕射諡曰成通志載人物

裴向字素仁遵慶子以蔭得調建中初署同州判官李懷光使趙貴先築壘於同州刺史李紆奔奉天向領州務貴先脇吏督役不及期將斬以殉民皆駭散向獨詣壘

開諭之貴先乃降同州不陷向力也累爲櫟陽渭南令
奏課皆第一擢戶部員外郎選爲太原少尹行軍司馬
歷陝虢觀察使以吏部尚書致仕向能以學行持門戶
內外親屬百餘口祿俸必均世稱其孝睦卒年八十贈
太子少保通志載人物

裴肅字中明宣子僑濟源貞元時爲常州刺史兼御史中
丞越州刺史浙東團練觀察等使時劇賊栗鍠誘山越
爲亂陷州縣肅引州兵破擒之自記平戎一篇上之德
宗褒美子三儔休皆舉進士侏狀元及第通志載人物
裴埒字洪中擢進士第以賢良方正對策第一補美原尉

聞喜縣志

卷之六

人物

四十二

藩府交辟不就四遷考功員外郎吏部侍郎鄭珣瑜委
校辭判研覈精密元和初詔入翰林爲學士再遷中書
舍人李吉甫始執政以情謂埒曰吾懵不及知比日人
物君精鑒爲我言之埒卽筆畧疏三十人吉甫藉以薦
於朝天下翕然稱得人坐覆視皇甫湜牛僧孺對策罷
學士爲戶部侍郎上器埒方直以爲可任公卿吉甫罷
拜中書侍郎同平章事加集賢大學士監修國史埒始
承旨翰林小心慎默旣當國請繩不軌課吏治分明淑
慝吐突承璀乘閒欲有關說上憚埒誠使勿言在殿中
常呼埒官而不名嶺南節度使楊於陵爲監軍許遂振

所誣詔授冗官垧曰以一中人罪藩臣法安在更授美官嚴綬守太原政一出監軍李輔光垧劾其懦以李鄘代之王承宗擅襲節度吐突承璀又欲撓垧權探上意自請往時澤潞盧從史詭獻征討垧固爭以爲從史內連承宗外請興師以圖身利且武俊有功於國陛下前以地授李師道而今欲奪承宗地賞罰不一沮勸廢矣上卒用承璀謀討承宗從史果反覆兵久暴無 旣而從史部將王翊元奏事垧從容以語動之遂得其大將烏重 等要領乃爲上陳從史悍傲往來神策軍不甚戒可因其機致之後無興師之勞上許之垧請秘其

計俄而重肩縛從史獻於朝垧奏承璀首謀無功人心不厭請流斥以謝天下乃罷所領兵先是天下賦法有三曰上供曰送使曰畱州建中初釐定常賦而物重錢輕其後輕重相反民輸率一倍其初而所在以畱州送使之入又降省估使就實估以自潤故賦益苛垧奏禁之一以省估準物觀察使得用所治州租調至不足乃取支郡以贍故送使之財悉爲上供自是起淮江而南民少息矣垧氣局峻整持法度雖宿貴不敢干以私諫官言得失執政多忌惟垧獎勵使盡言垧爲學士時引李絳崔羣同列及相又擢韋貫之裴度知制誥李夷簡

御史中丞皆繼爲輔相號名臣元和之治百度修舉稱朝無倖人焉五年暴風痺進退三月益瘡乃罷爲兵部尚書埒之進李吉甫薦頗力及居中多變更吉甫時約束吉甫復用銜之會上德宗實錄吉甫以埒引疾不宜冒奏乃徙太子賓客卒不加贈給事劉伯芻表其忠乃贈太子太傅埒始相建言集賢院官登朝自五品上爲學士下爲直學士餘皆校理史館以登朝爲修撰否者直史館以準六典遂著於令京兆少尹裴武使王承宗還得德棣二州已而地不入或言武還先見埒李絳言裴埒身備宰相明練時事勢不容先見武乃釋議者益

聞喜縣志

卷之六

人物

四十四

信處位之難云著有德宗實錄五十卷祀鄉賢通志載人物

裴度字中立澠池丞湊子貞元初擢進士第以宏辭補校書郎舉賢良方正異等調河陰尉遷監察御史論權嬖鯁直出爲河南功曹叅軍武元衡表掌西川書記召爲起居舍人元和六年以司封員外郎知制誥田弘正獻魏博六州於朝遣度宣諭弘正郊迎趨跪受命且請徧至屬州布揚德澤魏人由是歡服還拜中書舍人久之進御史中丞五坊小使閱鷹狗下邽令裴寰不爲禮因搆寰送詔獄度見延英言寰無辜上恚曰寰誠無罪杖

小使小使無罪且杖寰度曰責若此固宜第寰爲令陛下百姓安可罪上色霽乃釋寰王師討蔡以度視行營諸軍還奏攻取策與上意合且問諸將才賢否度對李光顏義而勇當有成功不三日光顏破洄曲兵上歎度知言進兼刑部侍郎王承宗李師道謀刺用事大臣已害宰相武元衡又擊度乃三進斷鞞荆背裂中單又傷首度帽羶厚得不死哄導駭伏獨騶王義持賊大呼賊斷義手度墜溝賊意已死因亡去議者欲罷度安二鎮反側上怒曰度得全天也若罷之是賊計適行吾倚度足破三賊矣分衛兵護第存候踵路疾愈詔毋須宣

政衙卽對延英拜中書侍郎同中書門下平章事由是討賊益急始德宗時偵中朝士相過金吾輒飛啓宰相至闔門謝賓客度以時多故宜延天下髦英咨籌策乃建請還第與士大夫相見詔可會莊憲太后崩爲禮儀使上議置冢宰度曰冢宰歷世官廢故國朝置否不常不宜狗空名稽樞務乃詔百司權聽中書門下處分王鏐家奴告鏐子稷易父奏沒冒遺獻度曰自鏐死數有獻今因告訐而檢省其私恐將帥聞之有以家爲計者乃命殺二奴時討蔡數不利羣臣爭請罷兵度奏病在腹心不時去且爲大患不然兩河亦將視此爲逆順會

唐鄧節度使高霞寓戰郤十二年宰相李逢吉王涯建言餉億煩匱宜休師唯度請身督戰上獨目度畱曰果爲朕行乎度俯伏流涕曰臣誓不與賊偕存卽拜門下侍郎平章事彰義軍節度淮西宣慰招討處置使人對延英曰主憂臣辱義在必死賊未授首臣無還期士壯之爲流涕及行御通化門臨遣賜通天御帶發神策騎三百爲衛而出李逢吉於外度屯郾城勞諸軍宣朝廷厚意士爭奮時諸道軍悉中官統監自處進退度奏罷之使將得顓制號令一戰氣倍未幾李愬夜入懸瓠城縛吳元濟以報度遣馬總先入蔡明日統洄曲降卒萬

人持節徐進撫定其人初元濟禁偶語夜不然燭饋遺酒食以軍法論度下令唯盜賊鬪死抵法餘一蠲除民始樂更生度以蔡牙卒侍帳下或止之度笑曰吾爲彰義節度元惡已擒人皆吾人也衆感泣旣而申光平以馬總爲畱後度入朝會命監軍梁守謙悉誅賊將度遇諸郾城復與人蔡騰奏申解全宥者甚衆策勲進金紫光祿大夫弘文館大學士上柱國晉國公戶三千復知政事三上書極論程昇皇甫鏞不可相不納自上印又不聽纖人始得乘罅初蔡平王承宗懼度遣辯士柏耆脅說乃獻德隸二州納質子又諭程權入覲始判滄景

德隸爲一鎮朝廷命帥而承宗勢乃離李師道怙疆度密勸誅之乃詔宣武義成武寧橫海四節度會田弘正致討弘正請自黎陽濟以合兵度曰魏博軍度黎陽卽叩賊境封畛比聯易生顧望是自戰其地弘正光顏素少斷士心盤桓不可用不如養威河北須霜降水落絕陽劉深抵鄆以營陽穀則人人殊死賊勢窮矣上曰善詔弘正如度言師道果擒五坊使楊朝汶收大賈張涉家直券根引數十百人列箠梃捕盧坦家客責償盧大夫逋券久乃悟盧羣券坦子上訴朝汶譟語錢入禁中何可得度極言中人橫恣上曰姑議東軍此細事我自

處辦度曰兵事不理止亂山東中人橫暴將亂都下上悟讓朝汶曰以爾使我羞見宰相命殺之上嘗語人臣當勵善砥公度曰君子小人以類而聚未有無徒者君子之徒同德小人之徒同惡外甚類中實遠在陛下觀所行則辨上曰朕豈易辨之度退喜曰上以爲難辨則易以爲易辨則難君子小人行判矣已而卒爲異縛所搆以檢校尚書左僕射兼門下侍郎平章事爲河東節度使穆宗初進檢校司空加鎮州行營招討使討朱克融王廷湊旣受命入賊境數斬將以聞俄兼押北山諸番使時元稹顯結宦官魏洪簡憚度復當國因經置軍

事數居中持梗度上書痛暴積過惡上不得已罷洪簡
積近職俄擢積宰相以度守司空平章事東都畱守諫
官叩延英言不可罷度兵搖衆心復交章極論會中人
使幽鎮還言軍中謂度在朝而兩河諸侯忠者懷彊者
畏今居東人人失望上悟詔度由太原朝京師及陛見
始陳二賊狀並入覲意感慨流涕伏未起謁者欲宣旨
上遽曰朕當延英待卿度之行移克融廷湊書開說諄
沓二人不敢桀皆願罷兵上欲必出牛元翼更使度騰
書布旨拜守司徒領淮南節度使會昭義監軍劉承偕
慢劉悟舉軍執之上問度何施而可度頓首謝藩臣不

與政辭不對上彊之度曰臣素知承偕怙寵悟不能堪
嘗以書訴臣是時中人趙洪亮在行營知狀欲持悟書
以奏陛下亦知之耶上曰我不及知顧悟誠惡之何不
自聞度曰雖悟得聞恐陛下必不聽且臣視天顏不咫
尺比尙未能決千里單言可悟聖聽哉上亟曰今日柰
何度曰必欲收忠義心使帥臣死節獨斬承偕則四方
羣盜隱然破膽矣上曰顧太后養爲子且我何愛更言
其次度曰投諸荒裔可乎上曰可悟果出承偕昭義遂
安是時徐州王智興逐崔羣諸軍盤互河北進退未一
議者交口請相度乃以本官兼中書侍郎平章事權佞

側目謂李逢吉險賊善謀共諷上自襄陽召還拜兵部
尚書度居位再閱月果爲逢吉所閒罷爲左僕射數請
對內殿求立太子翼日乃見上遂立景王爲嗣逢吉旣
代相內結宦官醜沮日聞乃出度山南西道節度使奪
平章事長慶四年王廷湊屠元翼家敬宗歎宰輔非其
人使兗賊熾肆學士韋處厚上疏曰臣聞汲黯在朝淮
南寢謀干木處魏諸侯兵息王霸之理以一士止百萬
之師一賢制千里之難裴度元勳巨德文武兼備若位
巖廟委參決必使戎虜畏威幽鎮自臣陛下當饋而歎
恨無蕭曹今一裴度擯棄於外所以馮唐知漢文帝有

頗牧不能用也上感悟謂處厚曰度累爲宰相而官無
平章事謂何處厚具道其由上於是復度兼平章事中
人至度所必丁寧慰安且示召期寶歷二年度請入朝
逢吉黨大懼權輿作僞謠云非衣小兒坦其腹天上有
口被驅逐以度平吳元濟也都城東西岡六符乾數而
度第平樂里直第五岡權輿乃言度名應圖讖第據岡
原不召而來其意可見上獨能明其誣詔復使輔政先
是上將幸東都大臣切諫不納度從容奏國家建別都
本備巡幸自艱難以來宮闕署屯百司之區荒圯弗治
假歲月完新然後可行倉卒無備有司且得罪上悅曰

羣臣諫朕不及此因止行汴宋觀察使令狐楚言亳州聖水出飲者疾輒愈度判曰妖由人興水不自作命在所禁塞朱克融執賜衣使者楊文端詭言慢己并訴所賜濫惡又勾假度支帛三十萬匹且請遣工五千助治東都上欲遣重臣臨慰度曰克融無恚而悖是將亡譬猛虎自哮躍山林憑窟穴則然勢不得離其處人亦不爲懼陛下無庸遣重使第以詔書言中人倨驕須還我自責譴春服不謹方詰有司所上工宜卽遣已詔在所供擬此則賊謀窮矣陛下若未能然則答宮室營繕旣有序毋遣工爲重勞朝廷緣召發乃有賜與朕無所愛

獨與范陽體不可耳上曰善用度次策克融聽命歸文端未幾軍亂殺克融時日晏坐朝度諫曰比陛下月率六七臨朝天下人知勤政河朔賊臣皆聳畏近開延英益稀恐萬幾奏稟有所壅闕夫頤養之道當順適時候道家法春夏早起取鷄鳴時秋冬晏起取日出時今方居盛夏謂宜詰旦數坐廣加延問漏及巳午則炎赫可畏矣上嘉納爲數視朝未幾判度支劉克明之變定策誅賊黨迎立江王是爲文宗加門下侍郎李全畧之子同捷求襲滄景軍奏討平之卽陳調兵食非宰相事請罷度支歸有司奏可進階開府儀同三司賜實封戶三

百太和四年數引疾上擇上醫護治中人日勞問相躡
詔進司徒平章軍國重事須疾已三日若五日一至中
書度讓免冊禮度自見功高位極稍晦跡避禍時牛僧
孺李宗閔同輔政媚度勲業久居上乃共訾其跡短之
因度辭位卽白上進兼侍中出爲山南東道節度使白
罷元和所置臨漢監牧千馬納之校人善田四百頃還
襄人頃之固請老不許八年徙東都畱守俄加中書令
李訓之禍上書申理全活數十姓武德縣主藏吏盜錢
亡命捕不得節度温造責其令償負繫三年度言之得
釋時闡豎擅威度不復有經濟志乃治集賢里第午橋

綠野堂把酒不問人閒事而上知度年雖及耄神明不
衰每大臣自洛來必問度安否開成二年復以本官節
度河東度牢辭老疾上命吏部郎中盧洪宣諭意曰爲
朕卧護北門可也度乃之鎮易定節度使張璠卒軍中
將立其子元益度遣使譬禍福元益懼束身歸朝三年
勾還東都眞拜中書令卧家未克謝詔先給俸料上已
宴曲江度不赴上賜詩曰注想待元老識君恨不早我
家柱石衰憂來學邱禱別詔曰方春慎疾爲難勉醫藥
自持朕集中欲見公詩故示此異日可進使者及門而
度卒年七十六上聞震悼以詩置靈几冊贈太傅諡曰

文忠贈禮優縟命京兆尹鄭復護喪度臨終自爲銘誌
上怪無遺奏敕家人索之得半藁以儲貳爲請無私言
會昌元年加贈太師大中初詔配享憲宗廟庭度退然
纔中人而神觀邁爽操守堅正善占對既有功名震四
夷使外國者其君長必問度年今幾狀貌孰似天子用
否其威譽德業比郭汾陽而用不用常爲天下輕重二
十年事四朝以全德始終及歿天下莫不思其風烈葬
管城五子識諗知名著有書儀二卷文集二卷祀鄉賢
又祀忠孝祠通志載人物

裴潏向從弟篤學善隸書以廕仕元和初累遷左補闕及

聞喜縣志

卷之六

人物

五十二

伐蔡復以中人領館驛使潏諫曰凡驛有官專尸之畿
內以京兆尹道有觀察使刺史相監臨臺中又有御史
充館驛使以察過闕猶有不職則宣明科條督責之誰
不惕懼若復以宮闈臣領之則內人而及外事職分亂
矣夫事不善誠於初體有非不必大方開太平澄本正
末宜塞侵官之原出位之漸上雖不用而嘉其忠擢起
居舍人柳泌韋山甫治丹劑潏極言金石性酷烈燒治
積年包炎產毒未易可制貶江陵令穆宗立泌等誅召
爲刑部郎中前率府倉曹叅軍曲元衡杖民栢公成母
死有司斷贖金公成受賕不訴以赦免潏議曰杖捶者

官得施所部非所部雖有罪必請有司明不可擅也元衡非在官公成母非所部不可以赦免公成取賄仇家利母之死逆天性當伏誅詔元衡流公成論死久之由給事爲汝州刺史以太子左庶子分司東都遷左散騎常侍出爲河南尹復還舊官卒贈戶部尚書諡曰敬湍悉心事上疾黨附嘗續文選自號元和通選計三十卷上之又有辯謗畧三卷通志載人物

裴坦字知進隋營州都督世節裔父又福建觀察使坦及進士第沈傅師表置宣州觀察府召拜左拾遺史館修撰歷楚州刺史令狐絢薦爲職方郎中知制誥而裴休

聞喜縣志

卷之六

人物

五十三

直不能奪再進禮部侍郎拜江西觀察使華州刺史召爲中書侍郎同中書門下平章事不數月卒坦性簡儉子娶楊收女齎具多飾金玉坦命撤去曰亂我家法世清其概通志載人物

裴佖字宏正綜子幼能文第進士補校書郎判等高授藍田尉詔城奉天嚴郢爲京兆政刻急本曹尉韋重規妻乳佖請代役要如程時稱其義上幸梁佖奔見行在授補闕建議討李懷光上深器之盧杞起饒州刺史與諫官執不可歷遷諫議大夫獠逐黔中觀察使韋士文詔佖代之部夷安服歷同州刺史中書舍人遷尚書右丞

時李巽以兵部尚書領鹽鐵將遷使局就本曹經構已半佶至以爲不可巽乃撤之時重其有守改吏部侍郎爲國子祭酒工部尚書卒贈吏部尚書諡曰貞佶清勁明銳所友皆第一流尤善鄭餘慶旣歿餘慶爲行服士林美之通志載人物

裴休字公美肅仲子操守嚴正童時兄弟業家塾晝講經夜著書終年不出戶有饋鹿者諸生共薦之休不食曰疏食猶不足今一啖肉後何以繼擢進士第舉賢良方正巽等歷諸府辟署入爲監察御史更內外任至大中時以兵部侍郎領諸道鹽鐵轉運使六年進中書門

聞喜縣志

卷之六

人物

五十四

下平章事言宰相論政上前知印者次爲時政記所論非一詳已辭畧它議事有所缺史氏莫得詳請宰相人自爲記合付史官詔可進中書侍郎太和後歲漕江淮米四十萬斛至渭河倉者纔十三劉晏法盡廢休命所在令長兼董漕褒能者謫怠者性江抵渭舊歲率領緡二十八萬休悉歸諸吏敕巡院不得輒侵牟著新法十條又立稅茶十二法人以爲便居三年粟至渭倉者百二十萬斛無畱壅建言收居茶以邸閣直毋擅賦商人又收山澤寶冶悉歸鹽鐵秉政五歲爲宣武軍節度使封河東縣子久之山太子少保分司復起歷昭

義河東鳳翔荆南四節度卒年七十四贈太尉休不爲
徼察行所治吏下畏信能文章書楷適媚有體法爲人
蘊藉進止雍閑宣宗嘗曰休眞儒者尤通浮屠法著有
拾遺問一卷希運傳心法要一卷通志載人物

裴贄字敬臣坦從子及進士第擢累右補闕御史中丞刑
部尚書昭宗引拜中書侍郎兼本官同中書門下平章
事尋兼戶部尚書幸鳳翔爲大明宮畱守罷俄進尚書
左僕射以司空致仕朱全忠貶爲青州司戶叅軍殺之
通志載人物

裴均字君齊倩子以明經爲諸暨尉數從使府辟以才顯

聞喜縣志

卷之六

人物

五十五

張建封鎮濠壽表團練判官建封扞李希烈以參贊勞
加上柱國襲正平縣男累遷膳部郎中擢荆南節度行
軍司馬就拜節度使劉闢叛先騷黔巫均發精甲三千
逆擊之賊望風却加檢校吏部尚書諫官李約疏斥之
元和三年入爲尚書右僕射判度支俄檢校左僕射同
中書門下平章事爲山南東道節度使累封郇國公任
將相凡十餘年卒年六十二贈司空著有荆潭唱和集
一卷壽陽唱詠集十卷渚宮唱和集二十卷峴山唱詠
集八卷盛山唱和集一卷荆夔唱和集一卷通志載人
物

裴瑾字封叔大理卿傲子也由進士上第校書崇文館轉
叅京兆軍事遷太常主簿考訂樂義作坐立二部伎圖
太常卿奇其才擢爲丞司空杜鴻漸奏定崇豐二陵禮
義再擢爲佐司空拱手聽成自開元制禮去國恤章累
聖陵寢皆撫拾殘缺有司無所徵瑾乃撰二陵集禮藏
之南閣轉殿中侍御史仍拜尚書比部員外郎刺史金
州渚茭原茅闢成梁稻陟萬年令會金州猾吏來揚言
恐喝曰不三十萬吾能爲禍瑾大怒罵之吏詭辭以聞
御史按章具獄兩謫道循二州左右掾會赦量移吉州
長史卒瑾以然諾聞長安中奔人危急輕出財力如索

聞喜縣志

卷之六

人物

五十六

水火晝接人事夜讀書考禮收摭策牘未嘗釋手一時
重之載裴氏世牒

裴識字通理度子性敏悟凡經目未始忘廕補京兆叅軍
擢累大理少卿討劉稹爲供軍使積平改司農卿進湖
南觀察使入拜大理卿襲晉國公半封爲涇原節度使
時番人尙恐執上三州七關宣宗擇名臣屯守以識帥
涇原親臨遣識治堡障整戎器開屯田勵將士戍限滿
者代親七十近戍由是人感悅加檢校刑部尚書徙鳳
翔忠武天平邠寧靈武等軍進檢校尚書右僕射靈武
地斥鹵無井識誓神而鑿之果得泉歷六鎮皆有可述

卒贈司空諡曰昭入平涼名宦祀鄉賢通志載人物
裴諗度子以文學著由廕官考功員外郎宣宗訪元和宰
相子思度勲望待諗有加爲翰林學士累遷工部侍郎
加承旨後爲太子少師封河東郡公黃巢迫僞官不從
遇害祀鄉賢通志載人物

裴燹直樞族兄武宗朝諫議大夫時大行以十四日殯成
服直言期日太遠不聽仇士良等追怨文宗凡樂工及
內侍得幸者誅貶相繼直言陛下繼統宜速行喪禮蚤
議大政以慰天下乃未及數日屢誅先帝近臣恐驚視
聽不聽貶驩州司馬前以武宗卽位漏名出爲杭州刺

聞喜縣志

卷之六

人物

五十七

史

裴渥燹直從子蘄州刺史會王僊芝來攻約斂兵就撫渥
許爲奏以官延僊芝及黃巢入城置酒厚賜詔以僊芝
爲左神策將軍押牙黃巢毆僊芝不受詔大掠而去渥
死之弟徹僖宗朝平章事中和元年正月自賊中奔詣
行在復拜平章事

裴樞字紀聖寅子咸通中第進士杜審權鎮河中奏署幕
府再遷藍田尉宰相王鐸知之遂直弘文館入蜀擢殿
中侍御史中和初鐸爲都統表署鄭滑掌書記龍紀初
進給事中改京兆尹雅善孔緯改右庶子出爲歙州刺

史遷右散騎常侍爲汴州宣諭使朱全忠聽命昭宗悅
遷兵部侍郎俄以戶部侍郎同中書門下平章事罷爲
工部尚書已拜檢校尚書右僕射同平章事出爲清海
節度使全忠言樞有經世才復拜門下侍郎平章事監
修國史累進右僕射諸道鹽鐵轉運使哀帝初全忠以
牙將張廷範爲太常卿樞以爲廷範勲臣自宜任方鎮
何用爲卿持不下全忠怒謂賓佐曰吾嘗器樞不浮薄
今乃爾卽罷樞政事拜左僕射俄貶登州刺史又貶瀧
州司戶叅軍至滑州全忠遣人殺之白馬驛投尸於河
年六十五初全忠佐吏李振曰此等自謂清流宜投諸

聞喜縣志

卷之六

人物

五十八

河永爲濁流全忠笑而許之通志載人物

後五代

裴謙度孫郁子有才學以五代亂晦迹不仕避兵徒同州
白水縣卒葬其里子普博通經史不求聞達通志載隱
逸

裴迪字昇之爲人明敏善治財賦精於簿書唐司空裴瓌
判度支辟出使巡官都統王鐸鎮滑州奏汴宋鄆等州
供軍院使鐸爲租庸使辟租庸招納使梁太祖鎮宣武
辟節度判官太祖用兵四方常畱迪以調兵賦太祖西
攻岐王師範謀襲汴遣健卒苗公立持書至汴陰詭虛

實迪召公立問東事公立色動乃屏人密詰之具得其
事迪不暇啓遣朱友寧以兵巡兗鄆以故師範雖竊發
而事卒不成太祖自岐還將吏皆賜迎鑾叶贊功臣目
迪曰叶贊之功惟裴公有之他人不足當也迪入唐累
遷太常卿拜右僕射居一歲以司空致仕卒通志載人
物

裴宗煥隱居不仕以詩書自娛卒葬垣曲通志載隱逸
裴羽字用化贄子爲河南壽安尉事梁爲御史臺主簿改
監察御史唐明宗時爲吏部郎中與右散騎常侍陸崇
使於閩海風飄至錢塘被畱經歲崇疾卒後錢鏐遣羽

聞喜縣志

卷之六

人物

五十九

還羽求載崇尸與俱歸鏐初不許羽以語感動鏐鏐惻
然許之因附羽表自歸由是吳越復通於中國羽護崇
喪至京師及其橐裝還其家士人皆多羽之義周太祖
時爲左散騎常侍卒贈戶部尚書通志載人物

裴皞字司東容止端秀性剛急直而無隱少好學唐光化
中舉進士爲校書郎拾遺補闕事梁爲翰林學士中書
舍人事後唐爲禮部侍郎皞喜議論每陳朝廷闕失多
斥權臣改太子賓客以老拜兵部尚書致仕晉高祖起
爲工部尚書復以老告拜右僕射致仕卒年八十五贈
太子太保皞以文學在朝廷久宰相馬尹孫桑維翰皆

皞禮部所放進士也後尹孫知舉引新進士詣皞皞喜作詩曰門生門下見門生世傳以爲榮維翰作相嘗過皞皞不迎不送人問之皞曰我見桑公於中書庶寮也桑公見我於私第門生也何迎送之有人亦以爲當通志載人物

裴約唐莊宗以李嗣昭爲昭義軍節度使約以裨將守澤州嗣昭卒子繼韜以澤潞叛降於梁約集州人泣而諭曰繼韜違背君親吾寧死於此不能從以歸梁也衆皆感泣梁遣董璋率兵圍之約與州人拒守求救於莊宗莊宗聞繼韜叛降梁頗有憂色及聞約求救喜曰約能分逆順耶吾不惜澤州與梁一州易得約難得也命符存審五千騎馳取約來及存審至遼州而梁兵已破澤州矣約戰死澤州立廟祀之平陽府志載人物